

stà vorà pregar el Papa compiaci la Signoria de la nomination de vescoadi. Son stato col magnifico Borgo, disse haver letere di 5 dil re di Romani ehe insta el Papa a darli danari, e Soa Santità li ha risposto non è per mancarli, poi disse el Papa voria abocharse a Piasenza et non a Zenoa, et che li era sta dito saria bon Soa Maestà venisse a Roma, poi passar a Napoli et de li imbarcar per Spagna pasado sia questa invernata, aziò non li ocora quello intravene al re Filippo suo padre quando de Fian-dra volse passar in Spagna et andò in Anglia, et disse el Papa conveniva andar in letica partendose de quì; et za 4 zorni è sta scritto a Cesare de questo et al reverendissimo Medici, et fra 5 zorni se aspeta la risposta. Il reverendissimo Farnese et altri lauda el venir a Roma. Don Piero de la Cueva non è ancora zònto. Scrive haver ricevute nostre letere zerca il reverendo arziepiscopò di Monovasia et per il perdon dil monasterio de Ognisanti vederà di exequirle. Et per una altra di 19 scrive haver ricevuto letere di 16.

*Di l' orator Contarini, di 19 et 20 da Vialco, ricevute a dì 22 dito.* Come ha ricevute per Zuan Gamba letere di 15 et poi dal comandador maior li fo mandate di 13, zerca la provision fata nel Friul per el passar de questa Maestà con li avisi de la presa de Coron, et li vilani aperse el mazo credendo fusse oro. Prima risponde da colui, dise quelle parole, non ha potuto haver altro, molti se fa saper che non sanno, *unum est* questa Maestà è aliena di guera, vol lassar Italia pacifica et quieta, vien potente perchè non se fida de soldati, et Soa Maestà è ben satisfata de questo Stado et di le sue operation. Poi parlò di vituarie et di Coron al comandador maior, et messe ordine con soa signoria l'arzievescovo de Bari, comandador maiordomo don Lopes de Soria maistro dil campo et io fossemo insieme per parlar dil camin, perchè Soa Maestà vol andar per la più dreta a Mantoa, la letera a don Ferante vadi de longo, si farà li alozamenti a la Trevesa, Ponteba, Venzon, San Daniel, Spilimbergo, Sazil et Coneian, questi se farà in 7 zornate. Questa sera ha cenato con mi do zentilhomeni italiani, dicendo esser venuti per cavarsi la fame, me hanno dito li fanti sono 10 in 12 lege lontan di qui da 4 in 5000 italiani, capi Fabricio Maramao, conte Filippo Tornielo, Zuan Batista Gastaldo et Mutio Colonna, i qual non sono mutinati, et Fabrizio ha mal de rene et orinava sangue, le qual fantarie se levò et andono a la volta de Graz per venir per Lubiana a Gorizia poi in Friul, ben pagati da Cesare.

*Dil dito, di 22, da la Trevesa, ricevute a dì 24, in Pregadi.* Come havia ricevuto nostre di 20, zerca el venir de oratori. Hozi l'imperador è zònto qui, diman partirà per Ponteba, zuoba a Venzon et venire a di . . . . a San Daniel. Et parlando de questo, l'imperador era a la finestra et disse doman saremo a Ponteba, però li oratori non vengi inanzi de Venzon dove se troverà refrescamenti, et disse el comandador non haver hauto el tempo de spazar le letere al Doria che 'l vegni, per la via dil suo orator a Venetia al qual scrive questa Maestà si 'l pol mantener Coron qual Turchi l'hanno fortificato.

*Dil Zante, di sier Matio Barbarigo proveditor, di 28 Septembrio, ricevute a dì 24 de Octubrio, manda questa deposition, et tien messi fuora per saper l' exito de l' armata dil Doria.* A dì 28 setembrio, sabato, al Zante, Nicolò Fain capo de cavalarioti, in questa insula mandato per il clarissimo proveditor nostro con una barca a Coron per intender il successo di le cose cesaree, questa matina ritornato referisse zuoba preterita damatina 28 di l' instante esser zònto a Coron, el qual sabado avanti 21 ditto si rese a cesarei salvo l' aver et le persone per la interposition de dui turchi, che è sta pagadi, che veneron a dimandar pati al signor principe preditto. Prima però datoli una grande et general bataglia et al mercore andarono fora i turchi con el suo haver, nel qual zorno el dito signor principe aldite messa in Coron in la chiesa di Santa Maria et la zuoba sua Signoria andete con le galie a Castel Franco a far aqua et el simel feceno le barehe di le nave, poi ritornato quel zorno a Coron fono tochat li tamburi, et tutte le fantarie cesaree montarono su le nave et su le galie, et fu a l' *Ave Maria* esse zorno di zuoba da sera per la galia dil principe trata una artellaria per la levata sua dicevasi pubblicamente che voleano vegnir a l' impresa di Modon, et viste parte di esse galie che venerono alla punta di la Sabionera di Coron per vegnir verso Modon. Referisse *etiam* che'l zorno di sabado erano venuti zerca cavalli 100 per soccorso di Coron con el Parafiamburaro di la Morea, et con el fratello de Zatal chadi et el schiavo di la Porta nominato Mustafà bei, et erano intrati in la porta dil borgo a Santa Veneranda, et fono per spagnoli et quelli di la terra serate le strade con arbori che a questo fine tagliarono, e al ritorno de ditti turchi fono amazadi quasi tutti con essi capi. Dice *etiam* haver inteso nel combater di Coron esser